



Pou Piblikasyon Imedya: 23/06/2023

GOUVÈNÈ KATHY HOCHUL

LAVÈY ANIVÈSÈ DESIZYON DOBBS LA, GOUVÈNÈ HOCHUL SIYEN LEJISLASYON KI RANFÒSE AKSÈ AK SWEN SANTE REPWODIKTIF

Lejislasyon (S.1066B/A.1709B) asire founisè New York yo ka preskri medikaman pou avòtman epi bay swen sante repwodiktif atravè sèvis telesante pou pasyan ki nan eta yo kote sèvis avòtman yo entèdi oswa limite

Elaji lwa aktyèl Gouvènè Hochul te siyen an 2022 pou pwoteje founisè swen sante New York yo k ap bay sèvis avòtman ak sèvis sante repwodiktif pou pasyan ki andeyò Eta yo fizikman nan New York

Gouvènè Kathy Hochul te siyen jodi a lejislasyon (S.1066B/A.1709B) vin lwa pou ranfòse aksè ak swen sante repwodiktif epi pwoteje pasyan ak doktè yo ki bezwen swen pou avòtman atravè sèvis telesante. Lejislasyon sa a elaji lwa aktyèl la pou asire doktè, founisè medikal, ak fasilitatè yo nan eta a kapab bay pasyan ki andeyò New York sèvis telesante san yo pa pè litij nan eta kote sèvis avòtman yo entèdi oswa limite.

"Nou temwen yon regresyon wonte nan kad dwa fanm yo nan peyi sa a pliske aksè ak avòtman limite nan eta yo atravè nasyon an", **Gouvènè Hochul te deklare**. "Nan New York, nou rete angaje pou asire avòtman rete an sekirite, aksesib, ak legal. Lejislasyon sa a pral ede plis fanm jwenn aksè ak medikaman avòtman ak swen repwodiktif nan asire founisè swen sante nou yo ka bay sèvis telesante bay pasyan andeyò eta a san pè repèkisyon legal oswa pwofesyonèl. Avèk pwojè lwa sa a, New York ap kontinye goumen kont lwa ki gen restriksyon sou avòtman yo epi ede plis moun jwenn aksè ak swen yo bezwen an."

Lejislasyon (S.1066B/A.1709B) pral ede asire ke plis fanm ka jwenn ak nan swen sante repwodiktif ak sèvis avòtman lè yo entèdi fòs lòd eta a kolabore ak ka kote yo pou swiv doktè nan New York ki sèvi ak sèvis telesante pou preskri avòtman medikaman oswa bay nenpòt swen sante repwodiktif bay moun ki nan eta yo kote ki gen lwa restriksyon sou avòtman yo. Li asire tou ke founisè ki konfòme yo ak pratik yo pa sijè ak disiplin pwofesyonèl nan men konpayi asirans kont neglijans medikal yo pou bay sèvis telesante repwodiktif sa yo bay pasyan andeyò eta a yo. Lejislasyon sa a elaji lwa aktyèl la ke Gouvènè Hochul te siyen nan mwa jen 2022 pou pwoteje founisè swen sante New York yo kont avòtman lè yon pasyan ki soti andeyò eta a prezan fizikman nan New York.

Komisè Depatman Sante Eta New York la, Doktè James McDonald, te deklare,

"Lejislasyon sa a pral pwoteje founisè swen sante yo pandan y ap pratike lamedsin epi pran swen bezwen sante pasyan pa yo. Pwoteksyon sa a se yon pati fondamantal pou yo vin medsen pou yon moun. Mwen remèsye Gouvènè Hochul pou lidèchip li sou pwoblèm sa a, epi paske li fè sa li kapab pou ede kenbe avòtman an sekirite, aksesib e legal nan Eta New York."

Lidè Majorite a, Andrea Stewart-Cousins, te deklare, "New York p ap kanpe san li pa fè anyen pandan y ap bwafwe dwa fanm yo ozalantou nou. Eta nou an se yon abri ki an sekirite depi lontan pou moun k ap chèche refij, epi Lwa sou Boukliye (Shield Act) a bay pwoteksyon ki enpòtan pou doktè k ap bay swen sante repwodiktif pou fanm yo atravè peyi nou an. Mwen ta renmen remèsye Senatè Shelley Mayer paske li patwone lejislasyon sa a nan chanm nou an, epi asire ke New York ap fè tout sa li kapab pou lite kont rekil terib sa yo sou dwa avòtman. Pandan n ap make yon ane kote yo te ranvèse Roe, mwen ta renmen remèsye Gouvènè Hochul tou paske li te pran mezi rapid pou I siyen pwojè lwa sa a pou li vin lwa ki garanti pwoteksyon sa yo."

Senatè Eta a Shelley Mayer, te deklare, "Sa a se yon lòt moman istorik nan wòl chèf defil Eta New York la pou pwoteje dwa pou resevwa sèvis sante repwodiktif, ki gen ladann avòtman. Lè Gouvènè Hochul siyen pwojè lwa sa a jodi a, ankò I ap dirije nasyon an nan kad pwoblèm sa a. Lwa sa a otorize founisè swen sante New York ki gen lisans yo, daprè lwa New York, pou bay sèvis telesante epi preskri avòtman atravè medikaman pou fanm k ap viv andeyò Eta New York yo. Mwen eksprime rekonesans mwen anvè founisè yo, defansè yo, ekspè legal yo ak kòlèg lejislatif yo, espesyalman patnè mwen ki se Manm Asanble Karines Reyes, Prezidan Carl Heastie ak vanyan Lidè Majorite Sena a, Andrea Stewart-Cousins, ki te travay pou kreye yon modèl nasyonal pou efò sa a. N ap riposte, men nou p ap fè bak, pou dwa yo te vòlè nan men nou è yo tel ranvèse Roe v. Wade. Mèsi ak tout moun ki fè jounen istorik sa a posib."

Manm Asanble Karines Reyes R.N, te deklare, "Antanke yon pwofesyonèl medikal mwen menm, mwen bat bravo pou Gouvènè Hochul paske li siyen pwojè lwa mwen an pou pwoteje konplètman founisè avòtman yo ki itilize telemedsin an lalwa. Mwen kontinye pwofondman pre-okipe ak efò aktivis anti-chwa yo fè pou afebli doktè yo nan kapasite yo pou bay pasyan yo swen adekwa ak pou afebli kontwòl pasyan an sou pwòp kò yo. Pwojè lwa anti-chwa sa yo gen yon enpak ki tanjibman negatif sou sante ak byennèt pasyan yo epi New York refize tolere li."

Prezidan Akademi Medsin New York la, Doktè Ann Kurth, te deklare, "Pwoteje founisè swen sante repwodiktif se yon etap enpòtan pou asire yon aksè ak swen kontinyèl pou pasyan yo. Nou kontan anpil pou nou fè pati moman istorik sa a pou sipòte efò Gouvènè Hochul pandan I ap asire Eta New York kontinye lidèchip li nan aksè ekitab ak swen sante repwodiktif."

Kofondatè ACT Access ak Manm Academy of Family Physicians, Doktè Linda Prine, te deklare, "Mwen salye avèk antouzyas sinyati lwa pwotèj telemedsin pou

mwen menm ak lòt founisè sante yo nan New York kapab bay moun ki bezwen swen pou avòtman medikaman atravè fwontyè eta yo lè mwen sèvi avèk lisans medikal NY mwen an. Mwen rekonesan anpil anvè Gouvènè Hochul paske li te siyen lwa enpòtan sa a, ki pa te kapab rive san kouraj ak andirans moun k ap sipòte pwojè lwa yo, Senatè Mayer ak Manm Asanble Reyes. Mwen tèlman fyè dèské eta mwen an te entèveni epi li te demontre ke li gen imanite pou kontrekare kriyote entèdiksyon avòtman atravè Etazini ak mezi sa a."

Nan kad Bidjè ane fiskal 2024 la, Gouvènè Hochul [te anonse](#) gwo aksyon pou pwoteje aksè ak avòtman epi solidifye estati New York kòm yon abri ki asire pou tout moun k ap chèche swen pou avòtman. Bidjè a ogmante pousantaj ranbousman Medicaid pou ranfòse aksè ak avòtman New York la, mete plis pwoteksyon done pou pasyan k ap chèche swen sante repwodiktif yo, mande konpayi asirans prive yo pou kouvri avòtman atravè medikaman lè yo preskri li san etikèt pou avòtman, epi bay 100.7 milyon dola nan novo finansman pou sipòte founisè avòtman yo ak swen sante repwodiktif yo.

An me 2023, Gouvènè Hochul [te siyen](#) lejislasyon pou pèmèt famasyen yo bay kontrasepsyón san preskripsyon ak yon pwojè lwa pou asire tout kolèj ak inivèsite publik nan sistèm SUNY ak CUNY yo ofri aksè ak avòtman atravè medikaman. An avril 2023, Gouvènè a [te anonse](#) etap enpòtan pou pwoteje aksè ak avòtman atravè medikaman nan New York.

Nan kòmansman ane sa a, Gouvènè Hochul te anonse deblokaj plis pase 1.68 milyon dola nan sibvansyon atravè [Pwogram pou Sekirize Sant Swen Sante Repwodiktif Eta New York](#) (New York State's Securing Reproductive Health Care Centers Program) la, ki ede asire aksè an sekirite ak sèvis sante repwodiktif ak avòtman nan tout eta a. Finansman sa a te fè pati yon angajma 2022 ki gen [35 milyon dola nan finansman nan tout eta a](#) bay founisè yo yon fason pou ranfòse sistèm swen sante repwodiktif New York la apre desizyon Dobbs la.

###

Lòt nouvèl disponib sou sit www.governor.ny.gov
Eta New York | Chanm Egzekitif | press.office@exec.ny.gov | 518.474.8418

[ANILE ENSKRIPSYON OU](#)